



'n Nuwe lewensfase

Om *Blitspos* te ontvang, stuur 'n e-pos na bladuitleg@nhk.co.za of grafies@nhk.co.za en versoek dat u naam op die versendingslys geplaas word

Nuus, berigte en kort kommentaar (uiters 100 woorde) aan produksie@nhk.co.za

Webblad van die Hervormde Kerk www.nhka.org

Die redaksie aanvaar verantwoordelikheid vir die inhoud. Menings deur skrywers uitgespreek, is egter nie noodwendig die beleid of standpunt van die Hervormde Kerk nie.

Skryf vir Blitspos oor jou ervaring van die lewe as predikant na emeritering, word ek gevra. Ek kan nie, want dit is nog te onlangs, ek is nie 'n kenner nie, ek het net vier weke ervaring daarvan, ek is nog in die vakansiefase, toe begin ek wonder...

Voor emeritering is die normale vraag wat oor en oor gevra word: *Wat gaan jy nou doen?* Jare gelede toe almal haar in haar matriekjaar gevra het wat sy die volgende jaar gaan doen, het ons dogter later geantwoord: *Ek gaan resieskamele afrig in Saoedi-Arabië.* *

Ek antwoord daardie vraag nou met die uitdrukking van 'n vriend se ma: *Nee man, ek help mos vir Albertus, en Albertus doen niks!* **

Die emeritaat het flinker aangekom as wat ek gedink het, al was dit eers na veertig jaar en ses maande. Die Dinsdagoggend daarna wonder ek hardop oor waaroor ek Sondag gaan preek. 'n Verbaasde, geamuseerde, voormalige predikantsvrou antwoord: *Jy preek nie Sondag nie.* Dit was nogal 'n skok.

Ek het nou al die geleentheid gehad om na vier preke van drie jong predikante te luister. Dit is anders as toe ons jonk was en dit is ook goed so; die lewe is ook anders, Christus bly dieselfde. Op die uithoeke van die kerk, waar ek gedien het, wanneer ek 'n Hervormde preek wou hoor, moes ek dit self preek. Die geskenk om in die kerkbank te sit en luister, het selde gekom. By ander begrafnisse en troues, het die kerkbanke gou hard geword vir my. Dit is vir my moeilik om na 'n preek te luister, om soos 'n lidmaat te luister, maar dit is 'n voorreg om te luister en ek geniet dit. Gelukkig preek ons dominee uit die Bybel.

Dit is ook moeilik om Bybel te lees, om te lees sonder om te dink aan preek, ek kry dit nog nie goed reg nie, maar oefen hard daaraan en hoor al meer.

Dit is goed om nie meer die verantwoordelikheid vir 'n gemeente te dra nie. Dit is lekker om met 'n glimlag vir lidmate te sê: *Ek weet nie, gaan vra die dominee.* Gelukkig het ons 'n goeie een.

Dit is natuurlik onmoontlik om los te maak van die mense met wie jy 'n groot stuk van die lewe se vreugde en seer gedeel het. Dit is gelukkig ook nie nodig om los te maak nie, want ons het nie verhuis nie. Daar gaan dalk nou meer tyd vir kuier wees.

Daar is 'n boek met boodskappe van lidmate wat tydens die emeritaatsaanvaarding vir ons gegee is. Ek besef opnuut die groot verantwoordelikheid wat 'n predikant het. 'n Predikant se woorde en voorbeeld het 'n groot invloed. 'n Mens voel klein wanneer jy lees oor die dankbaarheid en waardering van mense wie se lewens jy positief geraak het. Daar is jonger lidmate wat geen ander predikant as vir my geken het nie. Daar is natuurlik nie boodskappe van hulle wie se lewens ek onbedoeld nié gehelp het nie. Ek dink oor die baie foute waarvoor ek hopelik vergewe is. Met die lig van terugkyk sou ek natuurlik baie dinge anders gedoen het, maar 'n mens handel mos met die lig wat jy het.

* Sy het toe nie kamele gaan afrig nie, maar Chemie gaan studeer.

** Wanneer ek klaar vir Albertus help niks doen het, vra my dan weer.

Lief en leed



Raadslid Casper McDonald

- **Raadslid Casper McDonald** (67) van die DA en lidmaat van Gemeente Rooihuiskraal is Maandagoggend 21 Augustus oorlede. Hy was in die hospitaal vir 'n operasie en is daar aan 'n hartaanval oorlede. Hy was vir baie jare ouderling en kategesehoof in die gemeente. Sy roudiens vind Vrydag 25 Augustus om 11:00 plaas by Gemeente Rooihuiskraal, hv Santie- en Konstantynstraat, The Reeds. Ons innige simpatie gaan aan sy vrou, Trudie, hul kinders en ander naasbestaendes.
- **Die volgende predikante verjaar tot 1 September, en word hartlik geluk gewens:**
 - Saterdag 26 Augustus: Dr C (Chris) le Roux (66) (emeritus/Stellenbosch) en ds JJ (Joseph) Steyn (41) (nie-diensdoende)
 - Sondag 27 Augustus: Prof JH (Johan) Koekemoer (88) (emeritus)
 - Maandag 28 Augustus: Ds GC (Gert) van Staden (91) (emeritus)
 - Dinsdag 29 Augustus: Ds J (Jan) van Immerzeel (77) (emeritus)
 - Donderdag 31 Augustus: Ds J (Juan) de Beer (30) (Parys)
 - Vrydag 1 September: Prof PJ (Pierre) Jordaan (64) (Wonderfontein) en ds WRT (Tertius) Hindley (66) (emeritus)

Gemeentes en bediening

- Enige saak wat volgens die Kerkorde onder die aandag van die **Kommissie van die AKV** gebring moet word, moet mev Karen Breedt (karen@nhk.co.za) asseblief **teen 28 Augustus** bereik **vir 7 en 8 September** se Kommissievergadering. **Geen laat sake** sal in die agenda opgeneem word nie.
 - Op 11 Augustus het die **werkgroepe van die NHKA en die MRCC** by Gemeente Philadelphia byeengekom. Hul volgende ontmoeting word beplan vir 30 Augustus. **Op die foto** is van links na regs prof Wim Dreyer, ds Lucas Maenetsa, dr Wouter van Wyk, ds Modisaotsile Motloba en ds Oscar Madlala.
- 
- Gemeentes of predikante wat gereeld (**finalejaar**)**kategese aanlyn** aanbied, kan **dr Wouter van Wyk** kontak by wouter@nhk.co.za. Van ons lidmate in die buiteland het die behoefte om deel te word van 'n geloofsgemeenskap en binne sodanige geloofsgemeenskap belydenis van geloof af te lê.
 - As deel van die Bybelgenootskap van Suid-Afrika (BSA) se **90ste herdenking van die Bybel in Afrikaans** en as blyk van dankbaarheid, is die **2020-vertaling van die Bybel in Afrikaans** beskikbaar teen die spesiale prys van **net R79 (normaalweg R159)**. Lidmate word ook hartlik uitgenooi om enige tyd gedurende Augustus deel te neem aan die BSA se **virtuele Stap, Draf en Trap vir Bybels**. Kontak Anne-Marie Malan (malan@biblesociety.co.za) vir enige navrae of hulp.
 - Lidmate word ook hartlik uitgenooi na die **Dankfees vir 90 jaar van die Bybel in Afrikaans, Sondag 27 Augustus om 15:00** by die **Voortrekkermonument**. Die uitnodiging is in die besonder gerig aan lidmate wat in 1933 gebore is om eregaste te wees. Stuur asseblief die name en e-posadres van 90 jaar oue lidmate wat die geleentheid as eregaste wil bywoon, aan dr Wouter van Wyk by wouter@nhk.co.za. Hy sal dit dan aan die reëlingskomitee deurgee, wat die betrokkenes sal kontak om reëlings te tref.
 - Op **Sondag 10 September** vanaf 09:00 vier **Gemeente Witfontein haar 60ste bestaansjaar** tydens die **erediens** waarin al die eer aan die Here gebring sal word vir genade op genade wat in die gemeente beleef is. Witfontein nooi van harte almal wat in die 60 jaar deel gehad het aan hierdie gemeente of 'n noue pad met die gemeente gestap het, om saam met ons dié dankbare mylpaal te kom vier. Op **Saterdag 16 September** vanaf 18:00 vier ons die gemeente se "verjaardag" met 'n Bring-en-braai & Pizza-aand by Witfontein. Bring jou eie

vleis, drinkgoed, eetgerei, pizzabasis en bestanddele. Vure en pizza-oonde sal reg wees saam met 'n kuier wat die Here se genade luisterryk vier.

- **Vakature by UP se Fakulteit Teologie en Religie, Departement Nuwe Testament en Verwante Literatuur: Senior Lektor / Medeprofessor / Professor (een pos).** Die vereistes is onder meer 'n toepaslike doktorsgraad; minstens 3, 5 of 8 jaar tersiêre ondervinding onderskeidelik; bewys van publikasie in geakkrediteerde vaktydskrifte; en ervaring van akademiese administrasie en deelname aan departementele komitees. Vaardigheid in Grieks tot minstens derdejaarsvlak sal 'n aanbeveling wees. Kandidate moet aanlyn aansoek doen by www.up.ac.za, by die skakel Careers@UP. **Die sluitingsdatum vir aansoeke is 25 Augustus 2023.** Rig navrae oor aansoeke aan Jeanette Schoeman by Jeanette.schoeman@up.ac.za, en navrae oor die posinhoud aan prof Rantoa Letsosa by rantoa.letsosa@up.ac.za.
- **Werkruimte vir deelydse bediening: Gemeentes Otjiwarongo/Outjo-kombinasie.** Die kombinasie Otjiwarongo/Outjo in Namibië beskik oor 'n vakante werkruimte vir 'n deelydse predikant. Unieke wetlike voorskrifte oor werkpermitte deur die Namibiese regering beperk die opsies wat die gemeentes kan uitoefen vir die bediening. In die lig daarvan is die ideale kandidaat vir die deelydse pos 'n geëmeriteerde predikant in die ouderdomsgroep 65 tot 68 jaar wat nog die energie en inisiatief het vir gemeentewerk vir 'n periode van twee tot vyf jaar. Die kombinasie sal aansoek doen vir 'n tydelike werkpermit vir twee jaar, wat herhaal sal word indien die persoon vir langer kan of wil bly. Die vergoedingspakket sluit in: 'n gemeubileerde pastorie in Otjiwarongo; 'n gemeentemotor plus brandstof; en 'n kontantvergoeding per maand. Skakel ds Barrie Oberholzer by +264811487465 vir verdere inligting en administratiewe reëlings soos vir 'n mediese fonds.
- **Werkruimte: Samewerkende Gemeentes Boksburg en Witfield.** Aansoeke word ingewag van gelegitimeerde predikante van die NHKA om hierdie bedieningsruimte te vul. Die samewerkende gemeentes is Boksburg en Witfield aan die Oos-Rand, twee stadsgemeentes in die ring van Germiston. Boksburg het 'n sieletal van ongeveer 205, en Witfield 'n sieletal van ongeveer 78 wat meestal uit bejaarde lidmate bestaan. Die gemeentes se kerkgeboue is sowat 10 km uitmekaar en daar word elke Sondag op albei plekke 'n erediens gehou.

Aard en omvang: Van die predikant sal verwag word om die normale aktiwiteite van die gemeentes, soos prediking, kategetiese, spesiale eredienste en fondsinsamelings, te organiseer en te fasiliteer. Kontak met die lidmate, siekebesoek en huisbesoek is baie belangrik, en pligte soos in die Kerkorde moet uitgevoer word. Albei kerkrade verwag van die predikant om goed gefundeerde preke wat motiverend en leersaam is, aan te bied. Die predikant sal in albei gemeentes bevestig word.

Vergoeding: Die predikant sal aangestel word volgens kontrak vir 'n aanvanklike periode van 12 maande en sal vergoed word deur 'n enkele kontantbedrag wat R32 000 per maand sal beloop.

Aansoeke: Aansoeke **sluit op 28 Augustus 2023** en moet vergesel wees van 'n verkorte CV wat die kontakbesonderhede van twee referente insluit. Aansoeke word gestuur aan **beide** administratiewe beamptes van die gemeentes: Anneli Louw (nhkwithfield@gmail.com) en Bernadene du Preez (nhkaboksburg@gmail.com).

Diensaanvaarding: So spoedig moontlik, maar onderhandelbaar. Die kerkrade behou die reg voor om die lys van kandidate na die sluitingsdatum te verklein of te vergroot en mag self ander kandidate nader. Indien nodig, sal die pos weer geadverteer word. Vir enige navrae, kontak Anneli Louw (084 627 7253) of Bernadene du Preez (079 883 8741).

Vergaderings

- Donderdag 24 Augustus: Pensioenraad
- Vrydag 25 Augustus: Raad van Finansies
- Dinsdag 29 Augustus: DPS en Plesion Finkom

'n Gedig

Eer en oordeel vir mure

Lank leef die mure wat die dakke dra.
Af met die mure gerig om as versperrings te pla.
Lank leef die mure wat teen die koue beskut.
Af met die mure as grense benut.
Lank leef die mure wat aan skole skuiling bied,
en aan binnepleine vir dans en lied.
Af met die mure bedek met doringdraad,
geskep om geen gaping vir 'n vlugteling te laat.
Af met die mure van wagtorings voorsien.
Lank leef die mure wat as slaapkamers dien.
Af met die mure wat haat laat groei.
Lank leef brûe waardeur menslikheid bloei.
Af met die mure wat wonde oopkrap
(nog nooit kon mure verseker niemand word vertrap).
Lank leef die mure waardeur vensters lig bring.
Lank leef die mure waar die son kan binnedring.
Die mure wat die morrende wêreld omhein,
vervuil dié wêreld met skandelige landmyne.
Af met die mure wat mense verdeel.
Lank leef die mure van die druiweprieel.

Francis Combes (1953-)

(Vry vertaling: Wouter van Wyk, 16 Augustus 2023)

Eloge et condamnation des murs

*Vive les murs qui soutiennent les toits.
À bas les murs érigés en barrières.
Vive les murs qui protègent du froid.
À bas les murs qui servent de frontières.
Vive les murs abritant des écoles
Et ceux des cours où courent des farandoles.
À bas les murs couverts de barbelés
Faits pour barrer la voie aux réfugiés.
À bas les murs garnis de miradors.
Vive les murs des chambres où l'on dort.
À bas les murs qui font grandir la haine.
Vive les ponts et les routes humaines.
À bas les murs qui ouvrent les blessures
(Jamais les murs n'ont fait le monde sûr).
Vive les murs qu'éclairent des fenêtres.
Vive les murs que le soleil pénètre.
Les murs murant le monde murmurant,
font de ce monde un champs de mines indigne.
À bas les murs qui divisent les gens.
Vive les murs où pousser la vigne.*

Francis Combes (1953-)

(Uit: *Frontières – Petit atlas poétique*)

<https://www.decitre.fr/livres/frontieres-9782362294389.html>
2023

Kerklke en ander publikasies

- In die **2023 Winter-uitgawe van Vroueflitse** fokus die NHSV op volhoubare ouerskapbetrokkenheid en opbouende geestesgesondheid. **Ds Janine Bevolo-Manders** van gemeentes Witfontein en Rustenburg-Tuine kleur vir ons ouerskapbetrokkenheid in met **Geeltrui vir 'n pa!** en die koestering van ons kinders en die blywende effek van ouerliefde. **Mev Wializé Rocher**, visetesourier NHSV Hoofbestuur, deel in **Konflik en ek!** waardevolle riglyne ten opsigte van konflik wat orals figureer by die werksplek, skole en ons verhoudings en hoe ons dit kan gebruik as opbouend en positief. Volg die skakel <https://nhsv.org.za/publikasies/>
- Die **2022-uitgawe (Jaargang 10)** van die **Tydskrif vir Hervormde Teologie (THT)** handel oor **Hervormde Kerkreg**. Die outeur is **dr Barry van Wyk** (emeritus/Warmbad). Die volledige pdf is op die Kerk se webblad beskikbaar, en die gedrukte boek kan teen R120 per eksemplaar (versending uitgesluit) bestel word van mev Sarie Roux by boekwinkel@nhk.co.za. Daar is ook nog eksemplare beskikbaar van die **2021-uitgawe (Jaargang 9)** oor **Skrifbeskouing**, waarvan **prof Wim Dreyer** die eindredakteur was, teen dieselfde prys.
- Daar is enkele eksemplare van die 2023 **Almanak / Bybelse Dagboek** beskikbaar, teen R200 elk (versending uitgesluit). Bestel van mev Sarie Roux, by boekwinkel@nhk.co.za.



Boekwinkel-promosie
Beperkte voorraad

Bestel van mev Sarie Roux by boekwinkel@nhk.co.za

BOEKWINKEL-PROMOSIE

NOU SLEGS R250 **NOU SLEGS R30**

Beperkte voorraad

Bestel van mev Sarie Roux by boekwinkel@nhk.co.za

Toerusting

- Lees **hier** prof **Natie van Wyk** se artikel *Athene en Jerusalem ja, maar wat van Rome?* Hy skryf dat hy die lewensverhaal van Justinus die filosoof en martelaar bekend wil stel, aangesien sy tragiese dood verhelderend kan inwerk op die onlangse politieke teater in ons land. Wanneer die reg en regstoepassing wankel, bly Rome, as een van die bakens van beskawing, altyd kwesbaar.

- Ouderlinge kan gerus die **Hervormde Teologiese Kollege (HTK) se webtuiste** besoek. Gaan na <https://hervormdeteologie.co.za/ouderlinge/> vir inligting oor **gevorderde toerusting vir ouderlinge**. Tans verskyn daar reeds YouTube-skakels, PowerPoint-aanbiedings en Word-dokumente van Module I – *Die fasilitering van 'n erediens (ds Hannes van der Merwe)*; Module II – *Hoe berei predikante preke voor (dr Gerhard Nel)*; en Module III – *Die aanbied van 'n preek (prof Yolanda Dreyer)*. **Prof Stephan de Beer** se aanbieding van 29 Mei, *Hoe om jou gemeenskap beter te verstaan*, is ook daar beskikbaar. Laasgenoemde kan ook direk by <https://youtu.be/TnQNNDxzmP4> afgelaai word. Module II – *Die kuns van goeie gesprekvoering (dr Johan Bester)* is beskikbaar by <https://youtu.be/VfUgoBXodwA>, en *Hoe om lidmate in tye van krisis te begelei (dr Annelie Botha)* by <https://youtu.be/dUJ9kXs4Tvw>.



Gevorderde toerusting vir ouderlinge

Module II – Basiese pastorale vaardighede

Deel II – 14 Augustus om 19:00 (Zoom)
Deel III – 28 Augustus – Siekebesoek en sterwensbegeleiding

**Aanbieder –
Dr Annelie Botha**

<https://us02web.zoom.us/j/9427689935?pwd=d3d3K1NlClDU0dIplZCjSS9ZSFY4dz09>
Meefing ID: 942 768 9935
Wagwoord SGB

- **Excelsus Lentekonferensie: Lente in Bediening en Teologie**
19-21 September 2023
As it is in heaven: Kerkwees hier en nou
By Universiteitsoord en UP
30 VBO-punte
Foi: R1 380
Emeriti en studente R690
excelsus@up.ac.za
www.excelsus.org.za
(Die Lentekonferensie is deel van Excelsus se program vir Voortgesette Bedieningsontwikkeling – VBO – en word in samewerking met die Hervormde Teologiese Kollege en die VBO-Forum van die NG Kerk aangebied.)

Fondsinsamelings

- **Gemeente Drie Riviere** (in Vereeniging) bied **Vrydag 25 Augustus vanaf 18:30 'n Biltong&Brood-aand** aan by Klip River Country Estate, met Jaco Strydom as gaskunstenaar. Toegang beloop R200 per persoon (R100 kinders 12 jaar en jonger). Kontantkroeg beskikbaar (geen eie drinkgoed). Kom kuier, eet en dans heerlijk saam. Vir meer inligting, kontak Hennie (084 508 7849) of Lizelle (083 601 3328).
- Op **Saterdag 2 September** word daar **gedelf op soek na R36 000 se kontant**, terwyl daar gesmul gaan word aan 'n Pelgrimsontbyt, die Koekfabriek, Lekkerbekpoeding, kultuurplesier, pannekoekflippers, die Kerrie-en-rys-shack, boepensbroodjies, pap-&-kaiings, sosatiebroodjies, prego-rolle, 'n koffiekroeg, 'n snoepie, en groente vir Afrika. Die kinders kan kom baljaar in die pretpark – daar is treintjeritte, muurklim, *go-carts* en baie vermaak. Daar is ook *Preloved Toy Heaven*, Tombola en Heeltyd-speeltyd-kinderhoekie-vermaak. Hierdie is die kuiergeleentheid van die jaar by NHKA Witfontein te Stasiestraat 750, Pretoria-Noord. Delwerssertifikate kan aangekoop word @ R25 stuk by www.nhkwitfontein.co.za Sien jou daar!
- **Gemeente Philadelphia** se **Delphi Fees** vind plaas op **Saterdag 9 September**. Dit neem die vorm aan van 'n **musiek-, eet- en dansfees** en sluit ook 'n **kort veiling** in. **Kaartjies**

se pryse: R250 vir volwassenes; R200 vir studente; R100 vir hoërskoolkinders; en R50 vir laerskoolkinders. Die kaartjies se prys sluit alle aktiwiteite in – die kunstenaars, 'n Duitse ete met slaai en nagereg, en 4 gratis drankies vir elke kaartjiehouer. Daar word voorsiening gemaak vir 'n dansbaan, vertoning in die kerk van *Webber and Rice and all things Nice*, vooraf-kunstenaars en die hoofoptrede by die dansbaan deur Vending Machine. Belangstellendes kan 'n e-pos stuur na nhkphiladelphia@gmail.com, of skakel ds Martin Slabbert by 082 655 4787 of dr Sanrie de Beer by 083 226 1866.

- **Alphonso se monsteruitdaging:** Sien jy kans vir 'n groot uitdaging? Voordat die kans vir altyd verlore is?



Het jy al van **die Munga** gehoor? Die Munga is 'n monster – een van die heel moeilikste ultramaratons vir bergfietsers in die wêreld! Die deelnemers moet meer as 1 100 km tussen Bloemfontein en Wellington binne 5 dae aflê. Daar is 5 wedendorpe en 10 waterpunte langs die roete waar die ryers voorrade kan aanvul, maar weens die geweldige afstand en uitmergelende Karoolandskap is al die ryers tot 'n hoë mate op hulself aangewese. Die wedren stel ontsaglike fisiese en geestelike eise aan die ryer en net die taaiste ryers voltooi die wedren.

Dis amper soos die monsters wat maatskaplike dienste in ons land elke dag te bowe moet kom. **Rata Maatskaplike Dienste MSW** bestaan al 75 jaar lank, maar met die verswakking van die ekonomiese toestand in die land en die bedreiging van krimpende staatsubsidies, word hul monsters al hoe groter. Rata fokus op die beskerming van verwaarloosde, mishandelde en seksueel gemolesteerde kinders – kinders wat elke dag met hul eie monsters worstel. Oor die afgelope jaar alleen het Rata se 40 maatskaplike werkers meer as 40 000 individue bereik, aan amper 20 000 mense materiële hulp voorsien, en aan omtrent 1 500 kinders pleegsorgdienste gelewer. Terwyl dit ongeveer R10 000 per kind kos vir die proses van beveiliging, ondersoek, assessering, terapie, en hofverslae om 'n kind uit monsteromstandighede te haal en in pleegsorg te plaas.

Alphonso Theron het besluit om hierdie twee monsters aan te durf. Hy is 61 jaar oud en ry al 22 jaar lank fiets. Hy het die Cape Town Cycle Tour (vroeër die Cape Argus-wedren) al 18 keer gery, die 947 Ride Joburg 10 keer, en ook verskeie ander padfietswedrenne. Maar nou het hy besluit om die grootste monster van 'n uitdaging aan te durf: die Munga! **Hy wil die Munga voltooi – vir Rata en die kinders wat so dapper teen hul monsters stry!**

Sien jy kans om die Munga te ry? Sien jy kans om duisende kinders se veiligheid te verseker? Of sien jy kans om Alphonso en Rata te help om dit namens jou te doen?

Om die monster van Rata se tekort aan inkomste te tem, wil Alphonso R1 000 000 insamel – 1 000 persone of instansies wat elk R1 000 skenk.

Dís Alphonso en Rata se monsteruitdaging aan jou: Wees één uit 'n duisend!

1 000 x R1 000 = R1 000 000

Delf diep in jou sakke, dra by tot iets groots – voor die geleentheid vir altyd verby is! Doen dit nou! <https://rata.org.za/alphonso-se-monsteruitdaging/>

Elektroniese betalings:

Rata Maatskaplike Dienste MSW
ABSA tjekrekeningnommer: 020 600 209
Takkode: 632005
Verwysing: MUNGA + Naam

- Daar is 'n **geleentheid vir 'n gemeente of individu** om by die **Centurion Boeremark op Saterdag** pannekoek en/of *jaffles* te verkoop. 'n Stalletjie kos R250 per Saterdag. Deposito R250 eenmalig en sertifikaat van Tshwane vir kosverkope eenmalig R920. Kontak Christo Potgieter by 072 737 3644.

- **Oornagfasiliteite: Seniordal.** Seniordal beskik oor oornagfasiliteite vir persone wat vergaderings of kongresse moet bywoon, of wat dokters moet besoek, of verblyf benodig vir familie van persone wat in die hospitaal is. Daar is veilige parkering en 24-uur-sekuriteit. **Vir navrae oor tariewe en vir besprekings,** kontak Salomie Stolz gedurende kantoorure 08:00-12:00 by 012 329 4318, of na ure by 083 308 0520.

Barmhartigheid

- **Belfast Rusoord** bied onder meer 24-uur mediese versorging, CCTV, 24-uur-toegangsbeheer, drie gebalanseerde maaltye per dag, en aktiwiteite vir elkeen. Daar is fasiliteite vir semiversorging, verswakte bejaardes, en woonstelle vir selfversorging. Kontak Riana de Villiers by 013 253 31211 / 063 663 7449 / manager@belfastrusoord.co.za vir meer inligting en tariewe.
- **Athalia Uitrek in Bloemfontein** bied verblyf vir en versorging van bejaardes en persone met gestremdhede. Daar is enkel- en deerkamergeriewe in 'n huislike atmosfeer, verblyf met drie etes ingesluit, verblyf sonder versorging, en 24-uur-versorging. Navrae: 079 826 6363 / 084 023 0315 / 051 522 6089 / navrae@athalia.co.za / www.athalia.co.za.
- **Louis Trichardt-behuisingskompleks vir bejaardes** in Danville, Pretoria, bied kamergeriewe met twee etes per dag teen R3 850 per maand. Vir meer inligting, kontak mev Vicky Muller by 012 386 5310.
- **Ons Tuis (Andries Marié Oosthuizen) in Parys** het plek beskikbaar in die tehuse vir versorging van verswakte bejaardes teen R9 760 per maand. 'n Volledige versorgingsfasiliteit sluit in 24-uur-versorging, drie maaltye per dag en sekuriteit. Behuisingsfasiliteite teen R5 990 per maand is ook beskikbaar op dieselfde perseel; dit sluit drie etes en weeklikse wasgoed en skoonmaak van kamers in asook gratis deelname aan sosiale programme. Vir meer besonderhede, skakel matrone Teresa Broodryk by 056 811 2185.
- **Seniordal-aftreeoord** is die eiendom van die NHKA se **Gemeente Pretoria** en spesialiseer in lewensregverkope en verhuring aan selfversorgende persone ouer as 55 jaar. Die oord is geleë in die veilige omgewing van Rietondale in Pretoria. Seniordal beskik oor 24-uur-veiligheidsdienste en toegangsbeheer, en bestaan uit die volgende woonstelle:

Enkelwoonstel (*bachelor*): R495 000

Eenslaapkamer: R515 000

1½-slaapkamer: R520 000

Tweeslaapkamer: R560 000

Kontak Salomie Stolz by 012 329 4313 of 083 308 0520 vir meer inligting.

Studentesake

- **Studentebehuising. Gemeente Stellenbosch** kan veilige behuising op die kerkterrein en op die kampus aan studente verskaf. Dit bestaan uit óf enkelkamers met gedeelde fasiliteite, óf eenmensewoonstelle. Skakel dr Chris le Roux by 079 495 3239 of stuur 'n e-pos na stellenbosch@nhk.co.za vir meer inligting.
- **Studentebehuising. Gemeente Philadelphia** verskaf aan studente veilige behuising by Fleur de Lis op die kerkterrein. Dit bestaan uit enkelkamers met gedeelde fasiliteite. Die behuising is binne stapafstand van die kampus en winkelsentrums. Skakel dr Sanrie de Beer by 083 226 1866 of stuur 'n e-pos na nhkphiladelphia@gmail.com vir meer inligting.

Betaalde advertensies in hierdie nuusbrieff

Advertensies waarvan 'n private individu of instansie die begunstigde is, of waarin 'n gemeente 'n projek prominent wil bekendstel, kan in hierdie nuusbrieff geplaas word. (*Tekskennisgewings van gemeentes is gratis.*) Indien 'n jpg-weergawe van die advertensie

voorsien word, moet dit 15,5 cm breed x 6,5 cm hoog wees, resolusie 1878 x 815 pixels, 150-300 dpi.

Stuur die voorgestelde **teks van nie meer nie as 75 woorde** met of sonder eenvoudige grafika of 'n foto saam met die bewys van betaling aan mev Tessa Oppermann, per e-pos na produksie@nhk.co.za. GEEN advertensie sal geplaas word sonder die betalingsbewys nie.

Die **teks en bewys van betaling** moet mev Oppermann bereik teen 16:00 op die Maandag voor die betrokke uitgawe se verskyning. *Blitspos* word normaalweg die Woensdagoggend afgehandel en teen die middag op die webblad gelaai. Indien die plasing meer as een keer moet geskied, moet aangedui word op watter datums dit moet verskyn, met betaling vooruit vir al die beoogde plasings.

Die koste is R250 per plasing (BTW ingesluit). Die verskuldigde bedrag moet uitgemaak word aan die Raad van Finansies, ABSA tjekrekening nommer 020-000-287, takkode 632-005, **verwysing: u naam + Blitspos.** **Neem kennis dat die redaksie in uitsonderlike gevalle mag besluit om 'n advertensie nie te plaas nie en die adverteerder se geld terug te betaal.**

Gebed vir die week

Ons Heer,
wanneer boosheid ons wêreld verduister,
gee ons lig.
Wanneer wanhoop ons siele verlam,
gee ons hoop.
Wanneer ons struikel en val,
help ons op.
Wanneer twyfel ons oorweldig,
gee ons geloof.
Wanneer niks meer seker is nie,
gee ons vertrou.
Wanneer ons ideale verflou,
gee ons nuwe visie.
Wanneer ons afdwaal,
wees U ons gids!
Mag ons rus vind in u teenwoordigheid,
en mag ons,
deur ons aan u wil te onderwerp,
betekenis vind vir ons lewens.

JOHN D RAYNER, womansday.com

(Afrikaanse verwerking: Tessa Oppermann)